

四明叢書

張宗祥



50
2m

角東正

氣集

四明張氏約園開雕

序

董純齋先生諱琅覺軒年丈之祖也與兄璘齊名選新
昌訓導未任卒嘉慶初川湖流寇未靖詔自庶人以上
皆許上書先生拜疏歷詆諸帥格於浙撫不得上家居
授徒著述甚富尤精周官所著輯說十二卷壽鏞猶未
見也

見忻紹如四明
清詩略小傳

今僅見所編甬東正氣集四卷爲

光緒壬午正誼堂家刻本錄高中丞以下凡二十一家
文五十二篇分爲四卷昔徐霜皋有甬東正氣錄八卷
記遺事此則諸家遺文也壽鏞編四明叢書於諸家中

如錢忠介公集二十卷周囊雲文集三卷華嘿農過宜
言八卷毛象來吞月子集三卷及林蘭庵留補堂集選
付諸梓矣林霞舉朋鶴草堂集則錄副而未刊也楊南
仲刻其銅馬編董次公刻其讀易一鈔非文集也他如
陳忠貞公集三卷張蒼水集九卷魏布衣雪翁詩集十
四卷與夫宗愚囊馮王二侍郎屠駕部諸遺文皆桑海
謬謬之可風者也幸次第刊之夫鄉獻遺書流落於天
壤閒者何限一人之力如蚊負山卽其得之於友朋者
一粟海滄亦復渺乎其小總集之選殊堪珍也斯編雖

寥寥五十二篇而明清遞嬗之際忠臣義士浩氣之所
昭示讀之懍懍然如見其人豈惟鄉國之寶書抑亦天
下萬世之渠燠乎說者謂諸家之作更有大於此者胡
不錄壽鏞應之曰書之出有其時也卽出矣定哀之間
多微詞斯編成於嘉慶乙丑其有所諱可知已讀書論
世尤有望後之君子民國二十六年六月後學張壽鏞
序

序

錄高中丞文二篇李儀部文一篇錢忠節文七篇陸大
行文二篇林中丞文二篇莊太常文三篇楊尙寶文一
篇周貞靖文二篇王太常文二篇董戶部文四篇楊烈
愍文二篇華檢討文六篇王評事文三篇毛戶部文三
篇李駕部文一篇萬戶部文六篇任太常文一篇周監
軍文一篇林端節文一篇徐霜皋文一篇林雪蛟文一
篇凡二十一家爲文五十二篇分編四卷名之曰甬東
正氣集昔霜皋有甬東正氣錄八卷所載爲遺事此則

諸公遺文也全集余俱未見從他書錄出之吉光片羽
固鄉國一寶書矣嘉慶乙丑春二月鄞縣董琅純齋甫
序

甬東正氣集卷一

鄞縣董 琅純齋編輯

高斗樞

字象先一字玄若崇禎元年進士官廣湖按察使以守鄞功擢漢中巡撫福王時移湖廣

皆未達明亡歸里卒

詳述秦鄖情形疏

奏爲微臣守鄖四載謬膺撫秦恩命謹詳述秦鄖情形
亟懇大兵合勦事臣一介書生才識庸淺自崇禎元年
通籍先繇部屬洊歷郡守拔任監司至崇禎十四年陞
分守下荆南道按察使十五年冬逆賊李自成攻破襄

陽荆承相繼淪陷十二月十二日各賊乘勝直逼鄖陽臣統率文武將吏力戰三晝夜殺賊千餘賊始遁去十六年三月逆闖復發賊數萬力攻鄖陽臣統率各臣且戰且守一月有餘殺賊八千賊復東遁六月閒臣委推官朱翊辯同副將王光恩苗時化楊明起劉調元胡廷聘余啟凡等恢復均州又復保康擒僞官芮作聖八月閒臣親統劉調元苗時化游擊劉源潔韓原餘張文富王蜀良強新馬之服李開泰吳祿和等恢復光化又同督師所發副將惠登相徐勇進攻穀城僞官陳知攜印

出降擒斬賊將郭三益黃世龍丁自美等九人襄賊楊
彥昌發賊三千援穀登相與時化合營截殺擒斬殆盡
登相隨奉督師調去臣再調余啟凡王光泰許九德杜
元貴等兵進攻襄陽賊楊彥昌馮養珠路應標等出城
迎敵臣親自督戰各營奮勇截殺各賊大敗入城自守
臣督諸營四面攻圍一月有餘賊勢已窮蹙適聞闖逆
入陝攻陷漢中興安臣恐乘虛襲鄖祇得撤兵西歸至
十七年正月闖逆從西安發賊數萬會合路馮等賊再
來攻鄖臣又統率文武力戰五十日殺賊萬餘賊又遁

去臣體質孱弱素多火症自十五年冬至今年春枕戈躍馬日夜不休冒暑衝寒憂勞兼至怔忡嘔瀉百病交作祇緣封疆任重扶病登陴四月閒聞知府徐啟元已陞鄭撫臣亦叨蒙先帝殊恩加陞太僕寺少卿竊喜危疆得人病臣可覲休息鄭撫亦親見臣困憊之狀業許解任養病至七月閒署守道僉事朱翊辯接楚撫書內稱臣已陞秦撫托翊辯轉報臣杜門養病驚荷聖恩竊念天下事勢至此正臣子捐軀報國之秋安敢不力疾任事而秦中百二河山自去冬被賊勢同破竹卽鄭陽

接界如商雒興漢盡皆賊據欲求一旅之師爲臣恢復之資而不可得至若鄖陽之兵舊有七千今二年絕饑又兼荒旱饑餓之餘死亡將半且闖賊於七月望後又發路馮各賊攻鄖鄖撫與道將日夜戰守賊雖屢挫而闖逆亦屢增發各賊來攻經今三月尙未離鄖則欲分鄖兵入秦勢又未可止有陝西副總兵孫守法領兵五十餘人來鄖臣細加詢訪據云秦地雖陷民心尙思朝廷恩德舊將殘兵多有逃入山谷不肯從賊臣遂於八月初十日密差各兵潛往山寨招呼舊時兵將又委守

法馳至竹谿平利界上探聽漢興情形而賊氛密布差
兵迄今未回臣住鄖圖秦而鄖圍未解秦兵未集外援
不至糧饟久窮屢欲具疏叩闕孤城之外四面皆賊募
兵民中能齎奏本從賊中潛行者久未有人今多方設
計差官齎奏伏祈皇上迅發大兵刻期入秦臣所招山
寨遺兵倘能湊成一旅則或繇漢興或繇商雒必效犄
角之勢也臣策驚磨鈍素心不敢自後而體羸病久重
任實所難勝且望八哀親嗟子行役每一念至臣不欲
生伏懇皇上垂念封疆放臣歸里少盡一日菽水之供

別簡材能威望之臣蚤建澄清之績臣曷勝虔切之至
臣衙門關防自舊冬西安失事不知存亡的信見今書
吏承役緣道路阻隔亦無一人至鄭故臣疏無印鈐蓋
并祈聖裁

明殉難文林郎四川道監察御史贈都察院右副
都御史賓日陳公墓志銘

慨崇禎甲申三月之變蓋今古所僅覩哉明天子英武
親握太阿當中外訐潰時宵旰憂勞銳思救寧而盈廷
積狙無堪禦侮任者韎韁諸君子衷實選悞而貌乃陸

梁司馬之律不違行於棄甲之弁而賈販登壇輒委簡
書於草莽賊自成一小豎子耳稔亂多年游窺天邑倉
皇失措龍馭上賓豈不痛哉當時殉難僅三十許人然
求其生能戮力不分負國之愆而死則慷慨決烈可觀
帝靈於赤霄之上而無媿者指能多屈乎吾謂侍御陳
公其庶幾云公自己卯奉上命按蜀方是時賊獻忠自
成汝才輩既撫復叛狂逞楚豫閒天子倚重輔臣楊公
俾往督師爰發楚豫及秦各大帥從北而南環集於郾
襄公曰噫其將以蜀爲壑乎遂躬閱關隘悉飭文武爲

堵勦計而蜀鎮將羅尙文驕殘娛酒色公疏列其狀謂
必不能辦賊雖廟堂竟務優容然稍知戢矣蜀撫邵公
捷春悉調蜀師分列諸隘二十餘所蜀兵固單分益薄
而督師擁三省重兵尾賊後竟無一旅從閒道疾驅至
蜀以扼賊奔者追賊入蜀則以疏防詆邵奉旨速逮治
於是蜀民大譁謂疇擁重兵而任賊狂奔邵公固無罪
胡逮也不呼而集者數千人欲毆緹騎公力爲解諭羣
譁始定時奉旨公專護藩撫臣專辦賊公雖護藩居成
都乎猶以餘暇遍飭各郡邑糾眾城守務堅壁清野使